

CAPITOLO I

POESIE DI SATIRA POLITICA

PEGGIU DI L'ARMALI

Un liuni pinzau na matina,
Lassari la foresta e la sò tana,
Avennu fami di la carni umana.
Versu lu paisi s'avvicina,
Pinzannu di mangiari nquantità,
Facennu straggi di l'umanità.

Ci dissi la vulpi ntelligenti:
Liuni votatinni, dunni vai?
Cu sta mudirnità tu nun lu sai
Chiddu chi succeri tra la genti.
C'è cchiù serietà nta la furesta
Chi l'omini, li donni e picciriddi
Cu st'epuca si mangianu tra iddi.

LA SCUPERTA DI LA LUNA

Quannu Ammistrong sbarcau supra la luna,
Pi cogghiri li petri e pulvirazzu,
Virìa avvicinari na pirsuna,
Vistuta all'Italiana e ccu mustazzu.
Ci dissi trimannu: E vui cu siti?
Nenti amicu un si scantassi,
Grapìu la borsa, si canciàu l'occhiali,
Sugnu l'osceri cu li tassi.
Ammistrong riflittennu si dicìa:
E chistu chi arrivau prima di mia?

Caru Ammistrong nun si sta mica mali,
L'Italianu cerca d'ambientarsi,
L'America lancia missili spaziali,
Lu Governu Italianu lancia tassi,
Li lancia cu pratica e bravura,
La cifra arrivirà a settimu celu
E scupriremu la stidda cu la cura!

NUN CANCIA MAI

Un vecchiu a novant'anni
Era arrivatu a lu spiruni,
Tinìa a giacchetta rutta
E sciratu u pantaluni.
Sintìa sempri lastimi,
Mischinu avìa ragioni:
Iò votu pi la lista
Dunni stannu i maccarruni!

Ma dunni su sti maccarruni?
Lu scarsu reggi la balanza,
Ma nun lu pisca u quararuni,
Soffri schinu e pati panza.
Riflittemu a stu prucessu,
Lu quararu ha statu a centru
E va a rilentu lu prugressu,
Si lu quararu sposta a sinistra
Po darsi puru tempu persu,
Si lu quararu sposta a destra
Si va di novu a lu rigressu.
Quannu si sposta lu quararu
C'è li marpiuna pi d'appressu,
Chi nun lu perdinu di vista;
Pi l'operaiu c'è sempri broru,
Si sazianu li capu lista.

Ora pi mìa un c'è Sucialista,
Nè Democraticu Cristianu,
Nun existi Comunista,
Libirali, Republicanu;
Iò detestu li partiti
Di qualsiasi culuri,
Esisti sulu sutterfuggi,
Corruzioni e marpiuna,
E lu populu chi assisti
A sta quadriglia di buffuna.

A tempu di elezioni
S'appizzanu i manifesti:
Saremu tutti bboni,
Saremu tutti onesti;
Li miliardi li cunzumanu
Ittannu carti strati strati,
A la funcia di lu populu
E di li tassi chi pagati.

Ma ringraziannu a Diu,
L'indumani di la fini,
Fannu la vinnitta
Li scupi e li spazzini,
Ittannu sti cartazzi
Nta lu funnu du furguni,
Chi sirveru a cutuliari
Stu populu minchiuni.
E chidda bedda facci
Chi resta a muru mpicciata,
È lu ricordu, è l'emblema,
Di dda granni cugghiuniata.

LA VIGILIA DI LU VOTU

La vigilia di lu votu chi gran festa!
Chi granni rivugghiu chi succeri!
Nta tutti li paisi c'è timpesta,
Chiacchiari, spillacchi peri peri,
Ni vennu a rinchiri la testa
Tutta, d'illusioni e di pinseri,
Pi li nostru eccellenti votu dari
A lu spillacchiu chi tenta d'acchianari.

Si presenta lu zu Ciccio ncumpagnia
Dicennu: C'è n'amicu candidatu,
Tu parla cu to patri, cu to zia,
Ti raccumannu tuttu stu vicinatu;
Tu etta un sautu alla pirifirìa,
Prumettici a qualcunu ch'è spustatu
E a li maistreddi diccillu beddu tostu, :
Acchianannu l'amicu c'è lu postu!

L'amicu a lu zu Ciccio ci acchianau,
Di mmezzu di lu fangu si nni sciu,
DDa la mangiatura s'abbrazzau,
Sa passa bona ringraziannu a Diu.
Lu zu Ciccio iu mPalermu e lu truvau
P'un favuri a un terzu chi sbattiu
L'amicu sciu cu beddu spuntu
A lu zu Ciccio nun ci detti cuntù.

Dopu cinc'anni si torna, in alligrìa,
Cu li sacchetti ntipati, beddi chini,
Cu accatta palazzi a la pirifirìa,
Cu accatta tirreni, cu villini,
Cu si fici la bedda segherìa,
Cu sociu trasiu, a Montecatini;
E l'amici, cu lu zu Cicciu, lusingati
Arristaru cu li natichi squarati.

LI MARPIUNA

A Roma hannu abbacchiu a fornu
Cu cuntornu di patati
E Sinatura e Diputati
Si nni pappanu ogni ghiornu,
Si pappa beni, è a capitali,
Pi chissu tutti vonnu iri,
Lassatimillu propriu diri:
Cancia di saguma u stivali.

Puru strazzanu l'armali,
Lu fatturi e via via;
Ci va lu Colombu e pizzulia,
Lu Picciuni allarga l'ali,
Lu gran Liuni s'arricria,
Ci va u Cunigghiu e si sazià
E pi snilliri un pocu u piattu,
Ciu a Roma puru u Gattu,
Havi li baffi, li frasturna,
Ci sconza a tavula e li ciunna.

Stu gran manciari chi si mangianu
Dopu passa nfugnatura
E cu dulcisimi bivandi,
Si trasforma in luridura;

C'è un difettu naziunali,
Chi arrivatu ntò zu Bettu,
La spurcizia v'à all'apertu
E sporca strati e li canali.

E tutti stannu a lamintari,
Lu mastro d'ascia, lu carruzzeri,
Lu ferraru, lu varveri,
Si viri strunza galleggiari,
Nta li strati e li quarteri,
Paisani e passiggeri,
E lu populu stà nquetu
Li capi strunza fannu fetu.

Lu Comunista, cchiù pulitu
Chisti cosi li lamenta,
Nta la chiazza si presenta,
Si rinforza lu partitu.
Comunista Comunista
Chi un si cchiù all'opposizioni,
Metti tutti all'attinzioni
Di stù fituri chi c'è nvista;
Ccà lu populu stà mali,
Cosi giusti un cci nni sunnu,
Faciti fotu cu giornali
E svintagliati pi lu munnu,
Di l'America o Giappuni,
Di la Russia a la Spagna,
Cca cu acchiana sulu magna
E cosi giusti nun nni fà;
Avenu sulu a libirtà
Pi li marpiuna e li ca' ca'.

LU PIANU DI SVILUPPU

Ora c'è lu pianu di sviluppu,
Ddocu ci sarà nautru tappu;
Nta tutti li cosi c'esti sempri un gruppu
Chi si spiruggia cu la parola "pappu".
Chistu si chiamirà pianu di spurpu
Cu li liggi a favuri di lu mappu.
Comu veni ca n'Sicilia stu sviluppu
Chi pi la fami tu fui e iò scappu?

N'Sicilia sviluppa a dibulizza!
L'opiraiu, cu tanti di vrazza,
Sta granni celeberrima ricchizza,
Lu nord fa finta chi l'abbrazza
E pi darrè l'unghia ci appizza,
Lu sbatti e risbatti comu na ramazza,
E lu paga cu minchi pi sosizza.
C'è cu soffri e cu si inchi la panzazza!

Nn'avemu tanti di prumissi vani,
Comu na farsa di li burattini;
Attrezzi, contributi all'artigiani,
Terra pi sviluppari e cuntadini;
Tuttu si magianu li piscicani.
Aumentanu l'aneddi, l'aricchini
Mentri all'operai ci manca u pani
Chi ciuciulianu, comu tanti puddicini.

La lira è salva nun c'è chi diri,
È tantu veru ch si fà nutari;
Appena scanci centumilaliri
Già vularu e ti li poi scurdari.
Di chiacchiari ni fannu ncritinèri
Cu sti liggi fasulli chi ci sunnu;
Lu riccu s'abbrazzirà li parlamintari
E lu scarsu s'abbrazzirà o terzu munnu!